

四庫全書

集部

欽定四庫全書

集部

金淵集卷二

詳校官中書

臣徐志晉

侍讀臣孫球覆勘

謄錄舉人臣楊 炤

謄錄監生臣范維城

御製題仇遠金淵集

宋末元初鳴以詩早年仇白

珽

已名馳却看排次還面

目仇遠在宋末即以詩名其格高雅往往誦頡頏古人世  
所傳惟興觀集山村遺稿及近時歛人項夢昶所輯  
山村遺集其金淵集則不可復覩茲於永樂大典散篇  
中裒輯各體編為六卷考遠贈士瞻上人卷僧道衍跋  
之推挹甚至蓋深傾倒於遠者故其監修是書所  
載獨多似全部遺者無幾若有神物呵護者然信有

甲丁為護持雄逸或堪蘇

軾

伯仲清真亦偶陸滂  
塤篴

擬之李杜誠猶遠則實淵源限代時



欽定四庫全書

集部五

提要

金淵集六卷

別集類四元

臣等謹案金淵集元仇遠撰遠字仁近一曰仁父錢塘人因居餘杭溪上之仇山自號曰山村民世傳高克恭畫山村圖卷即為遠作也遠在宋咸淳間即以詩名至元中嘗為溧陽教授旋罷歸優游湖山以終遠初鋟所作

一編方鳳牟獻戴表元皆為之序分教京口  
時衷所作曰金淵集吾邱衍為之題詩所謂  
仇仁父解秩建康有新文曰金淵集者也二  
集皆已佚故明嘉靖中顧應祥跋其贈士瞻  
上人卷已有不見全集之憾世所傳興觀集  
山村遺稿皆從手書墨蹟蒐聚成編非其完  
書近時歙縣項夢昶始采摭諸書所載補輯  
為山村遺集一卷刻之杭州而所謂金淵集

者則不可復睹今惟永樂大典所載尚數百  
首考遠贈士瞻上人卷後有洪武二十一年  
僧道衍跋其推挹甚至蓋深傾倒于遠者故  
其監修是書載之獨夥疑其全部收入所遺  
無幾也謹以各體排纂編為六卷遠在宋末  
已與白珽齊名號曰仇白厥後張翥張羽以  
詩鳴於元代者皆出其門他所與唱和者周  
密趙孟頫吾邱衍鮮于樞方回黃潛馬臻皆

一時名士故其詩格高雅往往頡頏古人無  
宋末羸穢之習方鳳序述遠之言曰近體吾  
主唐古體吾主選瞿佑又記遠自跋其詩曰  
近世習唐詩者以不用事為第一格少陵無  
一字無來處衆人固不識也若不用事之云  
正以文不讀書之過耳其言頗中江湖四靈  
二派之病今觀所作不愧所言而此集出自  
塵埋蠹蝕之餘皆項夢昶本所不載若有神



物呵護俾待

聖朝而後顯者為尤可寶貴矣乾隆四十年四月恭校

上

總纂官臣紀昀臣陸錫熊臣孫士毅

總校官臣陸費墀

--	--	--	--	--	--	--	--

欽定四庫全書

金淵集卷一

元 仇遠 撰

四言古詩

晨入東寺閱藏行香

明星未高繁霜已肅娟娟落月猶挂茅屋我馬遑遑我  
車僕僕晨入緇林坐閱梵牘字奇義奧了不可讀空元  
無象奚事耳目簡書期程軒冕桎梏顧影自哂未能免  
俗名教真樂言語穀粟何時式微知足不辱

養鴈

雖雖陽鳥其居朔方竭來江南雪霜備嘗意不耐暑慮  
爾早亡乃安水土羽毛無傷仰羨鵝雛俯趨鷺行負影  
隻立何如還鄉秋風日高稻粱已黃且謀一飽勿思翱  
翔

野飲

土岡之西竹樹之下板屋三間娛此隱者時有肥鷄廐  
有羸馬豈無佳菊采不盈把且漉我酒放浪林野莫不

飲食知味者寡

題徐壽畫牛

此大武者二十八蹄茂樹之下豐草萋萋牧童且嬉夕陽未西何如桃林歸去來兮

五言古詩

送高仲山通州教授

通川得通儒善類蒙善教如此老成人真足重學校我昔客朱方曾窺管中豹言容既篤厚文字入元奧交游

二十年夷險同一操閒居虎林麓倚牕聊寄傲忽承北  
斗勅勇鼓來淮櫂華髮映青袍輕帆愜黃帽天晴宜征  
途芹藻春色到臯比坐可暖三載勤訓導惜哉龜手藥  
至老方取效載酒游五山何由共吟嘯

送楊志行赴徽州教授

峩峩紫陽山翼翼素王宮中藏朱子書頗有鄒魯風在  
昔三十年我嘗遊其中一溪練帶如環以千翠峰朝嵐  
與夕霏四景日不同惜哉屐齒折我舟遽云東子今振

木鐸出為斯文宗諸生列館下待問如撞鐘明經別同  
異折理開愚蒙獨坐三鱣堂教思傳無窮庠序足真樂  
詩書有近功行當自此升豈曰難為容平生韓孟交雲  
龍阻相從願言壽道體有書附鱗鴻

下壽

六十本下壽皤然成秃翁繫舟貞女瀨竊祿素王宮暮  
隨太守車朝迂御史驄我馬劣難騎却與無馬同老病  
厭徒步足力亦易窮將以馬易牛歸耕田園中聖人有

遺訓吾不如老農

小園梅已綠陰忽見一花甚香

此枝綠陰繁枝上子如豆一花裊然見香襲苔蘚透雖  
同梨雲夢亦出桃李右矜驕若自惜終覺老而瘦昔占  
百花先今處百花後春風少年場尤當敬耆舊

答陳宗道見寄

蹇予山澤臞飄飄一鷗似天風忽假便飲此金瀨水朝  
隨章句儒暮逐副墨子肯嘆飯不足可戀惟酒美賦芋



亦聊復久矣忘喜怒尾寧曳塗巾人生行樂耳

懷人耿不寐一夕三四起江東暮雲合渺渺隔秋水遺  
我詩兩章意古音粹美敢謂義熙餘及見黃初體君閒  
恥食粟我出慙為米流品賈不同黃河貫清濟

存耕吟寄姜景星

斗祥

吾不學老農種此方寸田善雨日培壅安得荒早年詩  
書苗且畚芟蘊母蔓延種固有厚薄獲豈無後先疇  
畎畝在後世兒孫傳何憂換八百奚止取十千却笑多

牛翁轉瞬無炊煙我獨遺以安本固實自堅耘業待歲  
晚韓公嘗勉旃

插梅

偶得數枝梅插向陶瓶裏置之曲密房注以清冷水肌  
膚若冰雪寒極粟不起歲晏且聞香春深看結子

示沈道人

有涯本無涯後覺即先覺名利念既輕生死路不錯棋  
枰幾勝負只看末一着寄語耽酒人飲時自斟酌

懷白石社尊師道堅

我思南山陽谷神何繇繇松下笑相別惚恍忘歲年寄  
我猶龍經文字入幽玄終期白石頂擊竹歌遊仙

和子野見寄十二辰體

良工鼠鬚筆戢戢囊穎露抄詩節經史汗牛車載路信  
知文中虎一代人不數細聲笑蚯蠅妙趣忘魚兔東野  
龍無雲胡為乎泥中蟠屈如睡虵虛此雲夢胃且騎款  
段馬野服隨田翁相羊山澤間真樂樵牧同開林斬猴

栽種花續春意他年處雞窠偃蹇增老氣錦鯨卷不宜  
貂狗續亦易老硯磨猪肝翰墨作遊戲

和卞仲祥

吾友卞南仲別我何忽忽家有六男兒乃與不死同阿  
祥更穎出疊疊有父風翰墨既瀟灑文字猶研窮西園  
益常飛北海搏屢空霜寒瀨水淺蛟龍若為容我將歸  
西湖春風入脩筇期子梅花下一酌孤山翁

和張仲實見寄

天地有義氣五行秋在金風吹庭前樹亦作清商音游  
子初離羣百感集一襟諒予老冉冉無復謠善淫吾方  
用吾悟安計他人心

古交色不變百鍊如精金一別又三月書札乖嗣音相  
望隔一水離憂盈中襟秋陽不能驕秋雨不能淫會面  
不可期月明千里心

和蔣全愚韻

金壇有耆英學博聲名早掇奇薄莊騷稽古極義吳君

甚似樂天稅冕居履道息遊鬻駱馬尚友敬胡杲我生  
六十年獨欠識此老來遊漂陽學文物委秋草黃沙昧  
人目忽見石皓皓君壇高難陟我壘虛易擣新詩十八  
韻韻韻俱壓倒交情託以宣一字一大好自慙溝中斷  
未足被華藻但令小兒輩藏棄以為寶相望衣帶水波  
弱限蓬島玉石資盪磨鐘鼓宜擊考何由即會面疑義  
共探討豈無問字酒可以濡吻燥昔為堅多節今為科  
上槁窮達等醉醒何庸寬懷抱

和金沙蔣文海韻

干祿非良圖好遯實素抱昔為駕壑松今作出山草茫茫海嶽隔冉冉齒髮老淵明書甲子拾遺歷天寶迷塗諒未遠貴在知幾早

我聞茅峰下曾有卧龍人風雲未承運淵潛聊自珍世無卞和氏誰辨玉與珉緇塵化衣裳我獨潔其身攬鏡忽自笑奈此白髮新

海翁古徵士接武諸公後聞名三十年傾盖即如舊示

我伐木章無能出其右簞簞秋竹竿坐睨蒲賢朽試問  
五兩綸何如一杯酒

昔我客朱方曾識三數公獨欠之句曲徧走山西東向

來劉與王

漫塘寶齋

疇能繼高風今我來金淵尸祝素王宮

閱人晨星稀見子夕照紅何當分鄰燭竹徑相與通

乙巳歲三月為溧陽校官上府經烏剎橋和陶

淵明韻

一日不見山曾次塵土積老來志益壯清遊等疇昔鍾



山草堂古每恨身微翮況是佳麗地牛馬風不隔遑遑  
問征路冉冉供吏役淵明田可秣肯為五斗易石橋跨  
淮水岐路由此折俗駕何時回為爾謝松菊

為金陵宗人賦雲谷詩

英英天上雲洞洞天下谷皎皎谷中人精神皎如玉卷  
舒一何心怡悅亦自足朝采孕丹砂夕氣被林麓豈無  
茯苓芝隨春入鋤斲自是長生苗根本元不俗三千年  
桃花八千歲椿木不如採藥歸枕石伴雲宿

西廟古檜和卞南仲韻

奇木有古意愛古人亦奇嘉禾老君觀毗陵烈帝祠二  
檜棟梁物俱逐劫火移竭來溧城西見此鐵石姿靈狸  
肯薦骨死豹仍留皮拏空有爪龍踞地無角螭三株兩  
失葉簷溜傷南枝僵立萬雪霜坐更幾隣儀我將護赤  
欄甃以蒼石墀深根直不朽雅操堅自持棟梁與新榱  
待用各有時罔俾孤山樹專美坡仙詩

學舍自吟

金淵文學掾旅食經歲年石田薄有收儘足裨俸錢絲  
毫了無補教養愧前賢竹添講堂後柳栽泮水邊  
鵝花粲籬落藻帶舞漪漣土龍欲致雨何能起雲煙  
革帶孔漸移老癯非學僊木居士何者求福真徒然

送虞師憲赴延平書院山長

我師文靖公

李侗

一傳子朱子佩服中庸書靜中識根柢

秋月湛冰壺瑩徹無瑕滓延平建精舍盛德宜世祀  
君往坐臯比文行成粹美秋風送書船南上二千里  
訝君

來何暮衿佩爭倒屣鳴道鐸方振問字酒已俟九京如  
可作文靖公亦喜予友有黃功子敏昔分教於此頗知文  
風盛十室九儒士是行若登仙劍氣炯青紫只恐席未  
溫思歸慕園綺

題西梵一翁雙清軒

上人碧雲房苔地不盈丈古石六七株修竹覆其上石  
兄既奇秀竹君亦高尚歲晚永相依屹不染塵埃方參  
香嚴師曾識牛丞相解鞍時一息吾其得閒放

山泉為惠君疇賦

空青穿秋旻瘦白噴夏雪若非林下士誰識此高潔  
山中非無雲蒼狗隨變滅山中非無月陰晴易圓缺  
不如泉混混萬斛常不竭洗耳塵即清釀酒香愈冽  
一醉三十年至味過麴蘖翁意不在茲勿為醒者說

梅夢

細梅眩晨霞素梅迷暮雪一翁著花間冰霜殊皎潔  
蜂蝶猶未知香味老逾烈夢中識歸塗踏遍孤山月

續夢

一夢續一夢夢短寒夜長顛倒無首尾哀樂迷存亡枕  
上忽自笑歷歷見未嘗至人本無夢有夢其何傷魚旆  
農夫喜熊羆男子祥吾年過不惑夢覺久已忘未來尚  
曖昧既往恐思量不知邯鄲道幾番熟黃粱

柰花似海棠林擒但葉小異

東風擅紅紫顏色分重輕愛此柰子花嬌豔何盈盈未  
開足標致紫綿燦垂纓開繁臙脂褪徐娘老而貞俗稱

為海紅結實葉底賴來禽難為弟海棠難為兄我評此  
三花同出而異名一枝挿銅壺坐翫心目明安得劍南  
樵素縑為寫生

題仲賓竹石

淇園綠猗猗昌谷黑離離謫仙硯池底茁此兩三枝輔  
以小崢嶸標度尤崛竒願堅歲寒心勿為風雪欺

暢師同玉上人遊茅阜

朝辭二竺寺暮宿三茅峰紅樹落一葉白雲深幾重遠

遊喜無雨清興尤宜冬遙知天壇上會與仙人逢

上人家海上喜從名山遊昔聞三茅君隱在千峰頭霜

寒草木瘦歲晚泉石幽不見梁邱伯使我心悠悠

懷中砥

夜醉

山翁醉如泥夜半方醒然既莫省宇宙况復知歲年閒  
愁置度外大道在目前日飲豈不佳第恐無酒錢

題西山真先生像

何年霜月子寫此西山真我冠褐寬博詩書發精神可



以寘巖壑可以登麒麟斯人不可作令我思乾淳

客來驚睡

長晝清和時惟有睡鄉美宰予邊孝先母乃今我是門  
外有客來推枕矍然起請啜一盃茶萬事且不理

次韻蕭饒州見寄

漢傑時引年  
卜居漂里

至人本天游上古惟野處如何種菊者亦勝封千戶萬  
鍾且唾去況復問阿堵先生東陵侯成敗久目睹幾程  
上金臺一節綰銅虎肯從赤松遊餐芝擘麟脯溫故窮

丹鉛投閒棄圭組自是橫江鯨終然辭網罟獨醒笑衆  
醉此舉冠千古二疏三高後欲數指難儂毋煩北山移  
猿鶴當起舞

昔寓南國居日與莨牧處今營西郭居官梅映窻戶硯  
山如可博尺度先畫堵此計當勇決結構須快覩伐藤  
斷長蛇卧石凜伏虎山厨富笋蕨客至當脩脯野芳散  
紅紫粲粲五雜組放懷山水窟脫迹名利罟平泉綠野  
堂盛事追往古願學樵夫拜相從丈人儂應笑趨炎人

奴顏八風舞

過岳公故居

赤脚踏層冰素蟾浴清水可憐偷桃兒竟以寒餓死木  
瓢掛空壁蠹冊堆破几有子如矮奴踉蹌入城市

剪白鬚

臨鏡忽自哂公然白紛如稚女眼最明為我剪白鬚  
髭如素絲不堪紐破襦叅差茁秋草蔓衍不可除明知  
我已老既白難再烏無肉令人癯眼昏妨讀書顏駟燭

之武吾非斯人徒

寄史貴質

延珪丁未同庚

淳祐六十翁生遇時節好朝遊漁樵社晚入詩酒保不  
為名利縛剛被花月惱時發少年狂未省身已老強歌  
無餘懽聞者笑絕倒齒髮漸凋疎形容頓枯槁平生千  
金軀豈不自愛寶幸然本根在收斂尚及早何必大藥  
資疋羸多壽考也無政事堂也無沙門島

錢儒珍家賞桂

寶孫

客至當飲酒醉此金粟堆秋風何時到叢樹叅差開馨  
香逆人鼻蓓蕾藏聖胎攀枝折其榮落穗浮酒杯後夜  
有佳月弄影須徘徊紅袖歌未終畫角毋庸催

涼風

涼風撼庭竹起舞如翠蛟亂葉打窻來卷盡破屋茅飛  
雲行太空萬竅爭怒號煩暑一掃淨解我心鬱陶

夜半見月

中夜月初上照我東床明我心本無事展轉寐不成仰

觀烏鵲飛俯聽蛩螿鳴念適從何來衣食非素營三年  
然後歸兒女各長成婚嫁願早畢吾其師向平

與楊志行郭斗南馬德潤屠存博呂公弼僧義  
慶游鍾山以峰多巧障日江遠欲浮天分韻  
予得浮字

昔讀寶公傳今作鍾阜遊緩行萬松間直上千峰頭古  
塔表木末寒泉貯巖幽遙觀江流奔始知此生浮甚愛  
雪竹庵逸駕吾將休

試涪翁題鄭欽硯

我有古鏡硯肌理細密勻云云散角痕巨口細魚鱗涪翁銘其背文字極雅馴鄭欽彥相者不知何如人回首數百載想見元豐春晴窓試磨洗墨舊兔穎新携歸供行齋侑此金石身

蟋蟀

蟋蟀一何多曉夜鳴不已居然聲相應各為氣所使零露聊飽蟬落葉才庇螳秋風滿庭砌安能久居此愁聲

不欲聽我聽差可喜平生勝負心一笑付童子

郊行集句

今日我重九

東坡

無錢對菊花

杜陵

昨夜雨鳴渠

東坡

既雨晴

亦佳

杜陵

出郭望西郊

杜陵

山林迹未賒

杜陵

顧憂斯人飢

昌黎

僵仆亂如麻

東坡

淵明胡不歸

東坡

吾居已及瓜

東坡

豈無一

尊酒

昌黎

誰敢負年華

東坡

聊為山水行

東坡

玩奇石路斜

六一

門生與兒子

東坡

邀我至田家

浩然

留連向暮歸

樂天

爛醉是

生涯

杜陵



種菊

鄰舍送我菊惜無盆盎裁分種東籬下倚窓日裏回初  
看蓓蕾青黃藥叅差開霜後苦無花老眼生塵埃得此  
少自慰可以薦一盃更用數日晴南枝須有梅

菊軒吟為劉君章作

大江秋風高紅葉紛滿地采采黃金華專此秋富貴主  
翁庭宇靜霜日自清媚豈不懷淵明異榻同夢寐春融  
桃李門一粲開落易願言堅晚節香淡有真意平生觀

物心飲水知秋味敢問楚人醒何如晉人醉

通甫弟歸里詩

霜重江水縮艤舟江之湄子今戒行色予亦數歸期已  
迫葵邱戍何求買山資酌別苦無酒秉粟供妻兒

風雨不出

儒官少公事閒坐如家居閉戶聽風雨重讀架上書豈  
無借書瓶小酌勿用沽豈無首宿盤園丁送嘉蔬溪童  
把釣竿時得徑寸魚采薇拾橡栗視此已有餘懷哉天

地恩不棄無用儒舍此將何之  
狂士多迷途終不如歸  
田一蓑溪上鋤

漫興

驢鳴有何好晉人多愛之  
胡不大堤上隔花聽馬嘶  
胡不茅屋下帶月聽荒雞  
我疑古之狂矯世本尚奇  
蠟屐柳下鍛結髦劍首吹  
端是味無味以待知者知  
滿腔浩然氣抑鬱無所施  
引頸一長鳴萬里風雲悲  
敢問驄立仗夫何為

卷一  
九日鄰翁招飲

佳節喜新霽作意登南山茲山雖不高亦足供躋攀平  
明放舟出日暮騎馬還行止不自由寸步千里艱北鄰  
朱公子言笑破旅顏相與一樽空徒得半日閒人生各  
憔悴仕路復間關六十始平頭甲子須循環粲粲黃金  
花才見秋一斑忍以髮膚脆犯此風霜頑何如歸去來  
期我巖壑間

戒飲

腹無貯酒腸小飲輒大醉醉餘嗽即作痰唾連涕泗酒  
亦有何好上策當自治無錢賒不來不飲特易事何如  
飯疏食飽矣曲肱睡莫笑我獨醒中有至樂地

飲少

此中無他腸飲少乃輒醉眼眩力不支便欲投牀睡頓  
空名利心願棄人間事淵明千載上當復知我意

有懷龔子敬子中

兩龔昔所慕二難今是似簞瓢魯儒生衣冠楚君子相

期歲月永不為弓旌起極目暮雲平脩筠悵予倚

和子野

少年挾英氣聞雞慕劉祖老來卧蝸牛風雨懶出戶酒  
空新炭盡景况詎堪覩自嘆衫袖短豈曰不善舞

此日始生日避喧作溪行出門阻風雪僕瘁馬亦驚歸  
卧春一窻隔窻聽雪聲擁衾守藥鼎客至慵出迎顏色  
日已老何由得青精未能歌雪兒聊復呼麴生夢中遊  
西園一壺梅下傾

報恩寺權公方丈

金淵多寶地此地殊幽深一錫得安穩豈必棲山林  
臨池照佛面見竹空人心江楓千百年時作海潮音

昔康節先生題安樂窩詩中云樂見善人樂聞  
善事樂道善言樂行善意此即吾友朱仲明  
樂善齋之意也繫之以詩

人生有至樂主善以為師善端本固有樂處亦自知我  
思舜之徒雞鳴日孳孳簞瓢在陋巷顏氏其庶幾之子

芝蘭室書傳為箴規量力行好事固窮無妄為何似安  
樂窩受用堯夫詩

予久客思歸以秋光都似宦情薄山色不如歸  
意濃為韻言志約金湔諸友共賦寄錢唐親  
舊

自我來湔陽四見木葉秋泮宮久敝漏量力完且修幸  
然土木備及此工役休巍巍大成殿勢與鄒魯侔聖賢  
日云邁可以遺象求捫心了無忤一掃築舍謀咫尺三



茅山乃獨欠此游且須歸去來速為營菟裘

迢迢滄水上有亭曰寒光水天散鷗鷺四望山蒼蒼向  
來于湖翁詩詞題屋枋幾思一遨遊歲月飛羽忙聞有  
白龍寺石塔標鐵梁老僧頗能吟年來曾遊方須乘未  
歸前秋晴呼野航

我非章句儒亦非漁樵徒少年逞麤豪提筆賦兩都老  
尚著儒冠却悔識之無既難棲山林又倦遊江湖一官  
僅供口康濟不在吾秋風方戒寒正道日荒蕪行矣且

歸耘寸田聊自娛

江海寄孤蓬飄飄一鷗似汲汲謀稻粱欲去行且止淵  
明真達者解印如脫屣五斗何足云可但折腰恥我嘗  
慕其人出仕亦漫爾客行入歲晏田稼逢水毀逝者既  
如斯吾屬可去矣肯負白鷗盟西湖釣秋水

早從方外遊志不在婚宦采薇陟西山采藻涉南澗挂  
杖僅過眉短衣不掩骭一為火宅累漸覺有憂患難任  
臣朔饑俯就博士慢大勝國子師三年腹藜莧棲遲行

路難堅忍為客慣昔為泛泛鳬今為噉噉鴈幸免簪楚  
慮官事粗易辦曷不歸孤山梅花臘前綻

秋空不肯明風雨滿荒城田父遮我說重九最喜晴此  
日晴色好大田足西成一冬暖如春絮炭價亦輕我雖  
將去官於人獨無情去年治城叟

卞南仲也

采菊餐其英今

茲隔存歿使我心怔營出門悵誰語卮酒當自傾

威鳳巢深林神龍潛巨壑泥塗困螻蟻城市防彈繳小  
草不自貴已鑄出山錯豈知甘苦淡有味俱不惡霜降

水澤枯歲晚木葉落榮枯識寒暑是非悟今昨不見粘  
壁蝸甘以退為樂二休行且三可但耐辱莫

去郭十五里翼然屏風山上有看經院創始昇元間山  
潤易生雲竹嫩未作斑登高佛閣小四面青回環空門  
事彌多永日僧不閒歸徑路委蛇班荆履屨顏信美難  
久留道遠足力慳遙知故山月問我何時還

喬木足秋聲紅葉表秋色因之念湖山恨不生羽翼形  
留神已馳游倦交漸息西隣夜砧發東隣曉機織我亦

有敝廬松菊暗荊棘北山百年墓苔竹手所植今長尺  
若干霜雪頗自力西風龍蛇蟄暗雨山林黑東望會言  
歸免我長相憶

七十古所希我今六十餘干時本無策謀生術尤疎就  
食泮水宮學圃乏新蔬凜凜座無氍毹踽踽出無驢厭厭  
尊無酒咿咿食無魚官居古云冷已矣當歸歟緬懷二  
女子夫家住桐廬三年千里別曠久不得書日者遣一  
力還家問何如江濱桐君山土肥藥堪鋤山根有閒地

或容房客居

未仕每願仕既仕復思歸了知歸來是宜悟求仕非干  
祿本為貧元非慕輕肥已昧好為戒復貽素餐譏時艱  
士失業十家九寒饑豈無禹稷思力薄願乃違吾門可  
羅雀載酒人來稀下考劣已書歸心疾如飛眷言長途  
馬老矣思脫轡晝短歌意長式微兮式微

人寄天地間官爵寄所寄所寄本儻來得喪亦常事何  
哉淺丈夫以此芥屑次達人視為輕譬彼擣蒲戲役滿

須過更代者乃未至故鄉隔太湖一舸歸甚易秋高山  
骨露始見松竹翠依依古梅村是中有深意

游子悲凜秋秋盡行當冬雨露變霜雪寒色日以濃豈  
無紫綺裘綻裂誰與縫不如早還家山林專素封掃松  
棲霞巔結茆慧日峰山南與山北春風入脩筇時止可  
以止道隆從而隆抱膝且長吟吾其師卧龍

盆梅

有客送苔梅來自馬塍裏斜枝巧盤折的皜數十蘂意

欲媚春風寧免少屈已獨憐鐵石腸竟作柔繞指他鄉  
忽一見少慰空谷喜何當解其縛條直有妙理幸不入  
俗眼入俗梅亦恥

居遊行寄費廷玉

大振

繁華錢塘郡佳麗金陵州吾生抑何修兩地得居遊杭  
也數年別昇也幾月留鍾山草堂靈林壑殊清幽開窻  
眺龍灣大江日東流鳳皇非故臺不見白鷺洲冶城塚  
累累青溪波悠悠長干塔尚在瓦棺閣已休雨花峙巖



顛錦石爛不收層樓天下無結構如龍舟六朝王氣歇  
故籓成荒邱至今秦淮上尚聞商女謳山水如此佳見  
有此客不懷古復思鄉日落川雲浮惜無老樊川酒酣  
吟杜秋

雪

忽驚小窻白開戶雪如此去年臘前無一白從此始霏  
霏甚可愛落落落勢未已炯炯眼界明沾沾田畯喜靜聞  
野屨吠立見蟄蛰死鼓腹飽可期勿畏寒墮指窮檐絕

煙火閉糴三日矣開倉糴官糧太守如父子

欽定四庫全書

金淵集卷二

元 仇遠 撰

七言古詩

立春

山城歷日到每遲新春殘臘俱不知若非一鞭醒寒夢  
梅柳爭春無了時牛刀小試東風手目中金牛果何有  
勾芒昇歸古廟中官吏升堂酌春酒

竹素山房小飲南徐唐正方善歌吳伶以長簫

和之客以鳳凰臺上憶吹簫分韻予得臺字  
少時聞簫白玉臺一曲未終丹鳳來金瀨空明秋水淺  
妙音久不聞蓬萊吳下老伶燕中回能以北腔歌落梅  
紅塵箏笛耳一洗便覺篴篥憤抑琵琶哀朱方臞仙古  
音律宮長羽短隨剪裁小春梅柳參差開肯待羯鼓花  
奴催我輩鍾情忘爾汝濁醪妙理惟醖醅晚風吹寒夕  
陽下有酒不飲令人咍今人青眼映山水古人白骨生  
莓苔不如相聚常啣盃嗚呼五公七相安在哉不如相

聚常啣盃

北園賞梅

梅花先受東君知一晴開遍南北枝  
吳姬持盃勸客醉已恨賞花三日遲  
主人惜花不惜酒自摘一枝春在手  
大開笑口問東風金谷幾人曾白首

題王師尹所藏三峽圖

上有趙明誠諸公題

廬山石橋天下奇奔湍赴壑潛馮夷  
倚闌俯瞰毛髮竦品題曾讀坡仙詩  
畫師筆幹造化窟豈必夜半夸娥移

蜀天茫茫千萬里彷彿猿聲亦如此何當譜入朱絲絃  
水底魚龍應洗耳

題李路負米圖

高堂有親今老矣孝子晨昏奉甘旨傷哉貧也敢辭勞  
百里迢迢親負米後來列鼎坐重裯積粟萬鍾不逮親  
古言周急不繼富為母請粟非無人

題范諤卿愛山吟境圖

前山排闥如虬奔後山擁壁如虎蹲三間茅屋白雲裡

一羣野鹿青松根世上好山誰不喜紗帽可能長隱几  
詩人見石猶下拜况是孤高有如此終南捷徑從渠行  
少室素價元非輕呼童下山汲清冷我欲洗耳聽猿聲  
送存博教授回虎林

雙鶴翩翩漂水陽紅塵不染素衣裳一歸華表飲風露  
一住滄洲謀稻粱湖海波濤多起伏爭食那能效難鴛  
憂然長唳楚天寬有日相從逐鴻鵠

草蟲圖

昨夜南山雷雨霽，蟄室初開百蟲起。草天菜秀蒲柳長，  
生意森然隨氣使。陰陽變態足纖巧，分得餘妍歸畫史。  
野蜂採蜜花房裡，官蛙瞠目莎池底。紛紛蚱蜢肆跳梁，  
款款蜻蜓齊點水。天牛穴桑奚其天，鬼蝶迷花聿如鬼。  
血國三千亦有蚊，黍馬十萬寧非蟻。蝸虎那能捋虎鬚，  
蝸牛誰堪執牛耳。蜨娘轉丸誠小巧，螳螂搏輪非勇士。  
鳴蟬嘶熱蟋蟀吟，一片繁聲愁客子。春風郊野豈不樂，  
籬落秋風又如此。坡仙舊詠只八物，若見此圖心更喜。



我摩老眼為題詩晴日一窓蠅撲紙

元夜嘆

虎林城中正月半十萬人家燈燦爛  
溧陽風景方放燈通宵不禁人遊翫  
大雪深寒萬木僵家家冷坐無薪炭  
典錢買竹又買燈糠油結凍點燈暗  
豪民張燈喚歌舞鼓笛喧轟夜忘旦  
忽聞買絲造海船府檄專令豪戶辦  
倉皇且救火燃眉縱有華燈何暇看  
老夫掩闥擁爐坐一盞青燈置書案  
良辰樂事悵難并頃刻歡聲作愁嘆

蘇公買燈狀陳子題燈詩癡兒騃女知不知月明月暗  
反覆手且願麥熟休王師

雪後祈晴

閏正月過二月來溧陽溪頭花亂開濃雲急雨洊雷電  
不待羯鼓花奴催江南天氣全然別昨夜清寒今日熱  
東風忽轉西北風吹作霏霏一天雪艷桃穠李睡海棠  
顏色頓減仍減香燕鶯羞澀未出谷惟見野水生渾黃  
晝夜交流已登岸邱麥畦蔬根浸爛州官憂水復憂民

明日祈晴泰清觀

送劉鍊師歸

并序

鄱陽劉君佐儒家子，倜儻有志壯欲囊書，叫  
闔為時用。天長翮短，未能奮飛。乃著道士服，  
薄遊南陬，棲九疑之雲，釣三湘之月，相攸庵  
止，擬他日龜藏計，宿留十年，然後歸故里，再  
轉漂上師式元宗，俯仰方圓，不尚衒襮衣冠。  
高潔炯如玉雪，頗厭出塵入塊，無意于人間。

事將俟我乎岳之麓湘之濱予喜其勇決高  
蹈庸贈以言君佐識定而志不分年盛而材  
有用與其之南何似且之北九萬雲程勗哉  
進步君佐名輔漢

雲中雞犬隨淮南手攀桂樹歌小山鴻寶秘書在玉枕  
有高尚者還童顏卯金家世學仙子半生遊山磨屐齒  
懶耕白雲君號耕雲種瑤草南去持竿釣湘水天風環珮滄  
江東鄙雲溧雨分鄰封浮邱洪崖未之見擁腫鞅掌常

相從拂衣浩然有歸志湘濱已卜誅茅地寸田尺宅可  
治生騎鶴纏腰非易事不如且向金蓮遊濯足萬里黃  
河流上界神仙足官府山中宰相輕公侯人生得意無  
南北蠅利蝸名等雞肋道人一絮據槁梧世間萬事槐  
安國

寒食遊陳園

梨花李花白鬪白桃花杏花紅映紅疎籬曲徑錦步障  
間以巨竹青玲瓏獨木為橋人不渡柴扉欲鎖春風住

豈知野禽浪蜂蝶時復銜花過牆去春波漲綠春日晴  
柳下扣門愁喜迎池邊亭上少盤礴坐牀指點呼麴生  
冷官况逢寒食節客味淒涼那可說殘盃冷炙何處無  
樂意生香聊自悅清明天氣晴更佳山林川谷多鶯花  
後庭遺曲少人唱踏歌推鼓爭喧嘩笑折一枝花入手  
樹猶如此人能久六朝舊事付東流醉翁之意不在酒  
月琴吟贈程禹仲

我月太古色我琴太古音色見音聲求焉能知我心月

到茅亭夜亭午據梧坐看胎仙舞本無圓缺無虧盈心  
迹雙清遊太古笑渠空向廣寒遊記得霓裳羽衣譜

應平叔送牡丹詩

草元亭前老侯芭贈我鞞紅三朵花一春風雨傷麥麻  
天香何事來山家且勸花王一盃酒更祝花王千萬壽  
洛陽名苑今在否未必開花大如斗有花可賞不負春  
紅紫轉眼俱成塵酣歌誰識李翰林酒樓柳絮愁殺人  
德興葉志道字士心葬母于銀山丹井之上作

丹泉吟

葛公學仙丹有泉葉公藏母丹泉邊泉流瀼瀼亂石底  
丹光炯炯長松巔陟彼此今瞻望母麻衣土枕常廬墓  
難將寸草報春暉祇覺煮蒿泣秋露男兒眼中非無淚  
有淚徹泉無厚地泉聲如咽淚如丹何待洩融歌大隧  
幽花淡月耿墓門不招仙魄招母魂子規一聲蒼石裂  
白雲渺渺山昏昏

題沈子和德冲畫龍



紅霞飛盡元雲同深山大澤生春風震雷一聲蟄戶啓  
老龍夭矯生蒼穹憶曾艤舟垂虹外舟子傳呼黑龍掛  
須臾急雨暗吳淞昔見真龍今見畫江南久旱草木空  
湖水陡落如秋冬蒼生望霓心顒顒阿香喚起隆中龍

送春寄友

老翁欲作送春詩借問春去將何之連朝醉不省人事  
昨夜春歸更不知客裝欲趁春歸去家在西湖綠陰處  
青青竹筍白白魚也勝客中常茹素杜鵑吻血啼未乾

髮白易黑留春難治城翁定有新語揀花風急生餘寒

贈溧水楊老

浙間筆工麻粟多精藝惟數馮應科吳昇姚愷已難得  
陸震楊鼎肩相摩我遊金淵飯不足破硯生苔塵滿目  
毛錐自笑不中書白髮紛紛老而禿中山博士

屠存博

子

墨卿貽書薦至楊茂林里儒大半習刀筆耳聞竽瑟誰  
知音善刀而藏歸勿出博士校書行有日定當致汝數  
百枚東坡有云北方無此筆

贈筆工沈秀榮

吾家歛石鋒芒出不但挫墨亦挫筆老懶作事苦不多  
一筆纔供兩三日近知沈子藝希有洗擇圓齊易入手  
不論兔穎與羊毛染墨試之能耐久禮樂三千成昨夢  
秃筆何止十八甕長槍大劒正當時毛錐子者直安用  
金淵萬家籍百儒學書用筆人豈無管城欲重連城價  
請攜椽筆遊江湖

醉醒吟

衆人皆醉我獨醒衆人皆醒我獨醉先生何苦與世違  
醒醉之中有深意或云酒是腐腸藥沉湎淫佚無不至  
或云酒是忘憂物醉鄉別有一天地左拍五柳先生肩  
右把三閭大夫臂醉時元自惺惺着醒來亦自昏昏睡  
獨醒獨醉豈多得衆醉衆醒堪一喟醉者自醉醒自醒  
卿法吾情各行志漂江美酒差可應說醉論醒姑且置  
公不見昔人有云且食蛤蜊那知許事

謝秋澗沈君瑞為予寫真

山村道人今老矣徒有虛名落人耳夢中誰記版築夫  
畫像雖多終不似偶來招隱九鎖山隱侯試筆開生顏  
鬚眉口鼻宛相肖只今置之泉石間聞君尤工畫山水  
萬壑千林生筆底可能更掃隱居圖布襪青鞋侶樵子

夏雨嘆

六月溧陽三日雨山田喜足低田苦學中亦有北鈴圩  
低處水深三尺許秧苗浸倒根已浮再種何由能入土  
老夫寓居西郭外厭聽村村蹋車鼓唇焦面黑嗟農夫

此生悔不業樵漁有山可采水可釣免得曉夜憂耕鋤  
去年一熟才了逋今年再熟力始舒豈期不待稻花白  
併隨荇藻歸江湖溧陽近與丹陽接不雨由來三數月  
河流淺澀田乾枯練湖放水通舟楫人間既是寒暑同  
天上何為雨暘別願移此雨慰彼心還我朱明作炎熱

州廳設醮即事

去歲今朝六月六暮雨傾盆風拔木今歲公宇醮祈晴  
晝日當空生暑溽羽士宣詞官吏拜燈燭熒煌香馥郁

須臾黑雲西北來如蓋如輪覆廳屋電驅霹靂掣金蛇  
簷溜奔騰瀉銀竹幃屏掀開旛幢飛卷盡香灰吹滅燭  
天威震怒莫敢喘謝罪忤營虞褻瀆少焉雨止涼颼颼  
天氣如秋失中伏四郊大田多黍苗一片瀟湘接湖汭  
村夫中庭涕泗下歸閭野老吞聲哭只恐戢戢生魚頭  
何止廣文飯不足天心仁愛子勿憂府公移文行振粟  
古言大雨不為災雲雨須臾手翻覆

荆溪橋

荆溪滔滔向東注長橋束之川后怒英風颯爽白晝昏  
此是孝侯斬蛟處客船逆上帆下檣何如懸水汴呂梁  
百篙攢石雙櫓健進退咫尺千丈強我來偶值凍雨作  
且近孝侯祠下泊平生忠孝侯所知世途更似風波惡

七月丙辰迎土山龍王入郭

秋陽皜皜人皆苦安得清風掃殘暑河流欲斷泉脉乾  
一望高田變焦土洮湖白龍迎入城行道燒香入亭午  
青天已響阿香車平地未見商羊舞昔時曾說雨催詩



今朝還要詩催雨  
願龍速降神力澍  
甘霖萬落千村熟  
禾黍

諭馬

山公有馬不肯騎  
東西徒步足力疲  
吾兒有力駕馭之  
兀兀馳驟那敢嘶  
爾馬亦似欺我老  
乘駟乘驄非不好  
老翁自愛下澤車  
放爾春郊飽青草

秋雨

杜陵昔日歌秋風  
卷去屋上茅三重  
村翁今夜嘆秋雨

衝倒簷前墻數堵瓦傾棟撓直見天寒侵素被不得眠  
相如家徒四壁立我比相如尤可憐錢唐近報融風起  
瓦礫塵埃半城市霜餐露宿人遑遑衣食難謀况居止  
呼童向曉收篁蘆補籬織箔聊枝梧雨飄有限行且止  
秋陽餘暖留桑榆嗚呼居得一日且一日丈夫安能事  
一室

寄南仲

坡翁昔年五十二翰林侍讀為學士溪翁年德與坡同

官職胡為未相似我道閒人勝貴人儻來軒冕溪雲比  
翁今田園瀨水上頗勝求田陽羨里翁今有弟夜雨對  
牀樂頗勝卯君懷遠驛中有感秋風起有時筆牀茶竈  
泛洮湖柳外梅邊從徙倚詩筒經卷靜工夫光景流連  
一彈指不論衆醉與獨醒不問此非并彼是客來不必  
及時事有酒且斟無即止從今笑傲五百年銅狄銅駝  
皆敝屣小山老桂敷秋香下弦月照西風涼今夕如此  
好風月胡不招邀坡翁霞佩同頽頽翁今放舟何所適

新詩漫表長相憶舟中不可久留兮盍早歸來共賦碧

雲餐白石

時生日  
出避客

留飲篠塢承隱君山莊

夾山崢嶸相對起貫以盈盈衣帶水白雲深塢碧篠合  
華屋盤紆蒼樹裡二三隱者古衣冠魚酒招邀極歡喜  
維舟岸曲信宿留惜別依依行復止東南風順帆上桅  
一轉瞬間行十里人生交契無故新他日停雲從此始

菊

楚澤秋高衆芳歇眼中見此霜下傑南窗粲粲八九株  
淡白深黃顏色別自笑背時難獨立恰是重陽過一月  
丁寧女子莫摘殘留伴梅花傲冰雪

和李致遠秀才

君深

平生志氣隘九州直欲濯足萬里流詎期功名坐蹭蹬  
不意歲月成繆悠防閑擬鑄鐵門限牽挽忽作金瀨遊  
栖巢未穩烏鵲月歸夢已熟鱸魚秋連宵風雨正僵卧  
何時臨壑容竒搜可人喜接一日雅此地判作三年留

說詩解字屢握手感時懷古頻搔頭吳郡才子止邱沈  
梁園舊賦餘枚鄒天上仙應無惜者眼中客復有此不  
家聲久識南北阮筆力眇視大小歐我方得友頗慶快  
子亦固窮忘怨尤蹄涔乃使鯨鯢伏拳石難與嵩岱侔  
紛紛嗜好異齊瑟磊磊肝膽呈吳鉤有才未遇政何損  
知爾不薦終當羞往事欲談遽易了濁酒既傾焉得愁  
平乘樓上王夷甫下澤車中馬少游須笑即今仕宦人  
嚅唥言貌如伶優若為田園足以活與爾水火無相求

一瓢陋巷誓不出孤雲野鶴心自由斯文將興天未喪  
游子纍纍徒隱憂

九日客中

菊糕萸蟹年年有未信今年此地無一瓶新釀止三白  
幸是杖頭錢可沽客况淒涼宦情薄釜欲生魚門羅雀  
未能早賦歸田園白酒黃雞差自樂戶曹司馬村校書  
相呼徑詣黃公廬滿頭挿菊把茱萸強歌強舞醉相扶  
何必更畫幽風圖

壽星相

西方長庚今我是東郡短人豈兄弟修眉班首頂如鬢  
蹒蹒衣裳猶楚製翩然來遊太平世上小兒驚且睨  
身外不須童鶴贅一粲人間八千歲

曉雪


昏昏慘慘窻映月索索颯颯風吹葉青童開門忽驚笑  
昨夜庭心一寸雪東方日出雪漸融簷花滴滴皆春風  
山村布被正酣卧愁殺門前賣炭翁



雨雪閉關子野公明仲祥載酒遠慰晚以詩見  
寄和答

溧陽三日雪平地城市十家九家閉官舍無氈冷徹骨  
省事正宜尋老計小人自不知紀年我久忘吾豈忘世  
出門無礙將何之已拚食貧了三歲

深雪沒履寒徹縣誰子扣門四詩仙袖中黃絹蘢白辭  
塗抹既醉鳬鷺篇我非不納學泄柳政爾欲眠如孝先  
忘形爾汝子勿怪坦率從來六十年



欽定四庫全書

集部

金淵集卷三

四

詳校官中書<sub>臣</sub>徐志晉

侍讀<sub>臣</sub>孫球覆勘

膠錄貢生<sub>臣</sub>趙珍

膠錄貢生<sub>臣</sub>杭光晉

欽定四庫全書

金淵集卷三

元 仇遠 撰

五言律詩

丁未元日

花申喜循環風霜變老顏  
閒身留泮水歸夢滿湖山  
雪凍蝗應避春暄鴈欲還  
桃符隨手寫禍福不相關

窓外梅方開

淡月江南樹香奇影亦奇  
春前十二月雪後兩三枝  
冷

藥疎堪數孤根穩不移西湖老仙宅清夢夜何其

正月二十四日送廉使出郊

閒騎羸馬出遠餞繡衣行愛此川原迴欣然風日晴隔  
籬梅半落斷隴麥初生每恨微官縛茅山負夙盟

野店當官道村醪喚客留偶因乘早出故作探春遊芳  
意林梢靜晴光水面浮人言有龍洞近在石山頭

聞楊大受凌吉叟吳次山諸友訃音有感二首  
落落霜餘樹疎疎曉後星經年才契濶故友半凋零有

夢懷風采何人作墓銘老孤無限淚空望浙山青  
少長皆吾友相期滿百齡生分青白眼死隔短長亭蕉  
本身為幻藤床夢是醒中山醇酒在且醉學劉伶

孫康侯北歸

淮海十年別北歸今幾時鏡中無舊髮囊底有新詩每  
恨為官縛翻令見面遲清都遊歷事還許俗人知

夢得墨四片一差短戲呈廷玉

昔賢曾夢筆夢墨定何如應使山中隱重研世上書磨

人驚老大飲汁笑空疎長短無庸較三螺已有餘

陸雲得石

墨數十斤

送兄三螺

四月十六夜月蝕

盛服拜清夜中庭朝太陰凡來仰天者俱有愛君心目  
斷山河影耳聞鐘磬音還光俄頃易涕泗漫沾襟

送田道士歸茅阜

我愛益東野君師田子方放舟游瀨水飛舄返華陽有  
酒須同酌真情不可忘仙源橋下徑何日共徜徉

庶公子家藏元石名武夷春雨

至寶忽橫道峯巒高復低數尖靈壁石一曲武夷溪黛  
色春浮玉黃流雨曳泥遙知千載下名與峴山齊

醉聞杜宇

家家酒似池日日醉如泥海燕聊為客杜鵑何苦啼狂  
那知帽落歸不為花迷信筆成詩句苔牋小草題

移牀詩

莞簟輕輕卷藤牀故故移暑塵無避處客舍有涼時開



帳迎風易鉤簾看雨宜綠陰更清絕舊竹長新枝

長晝

閒官少公出長日足高眠律已惟三尺埋頭又兩年雖  
無乞米帖安得買山錢莫聽閒唇舌行藏任老天

處暑後風雨

疾風驅急雨殘暑掃除空因識炎涼態都來頃刻中紙  
窓嫌有隙紈扇笑無功兒讀秋聲賦令人憶醉翁

閒步

邨逕桑麻合扶筇信所之綠陰晴冉冉白日步遲遲野  
繭粘高樹山雌入破籬豈無款段馬常是小兒騎

鼓角

五更相次曉一曲有餘清忽醒山林夢遙聞鼓角聲背  
風還迤邐帶月最分明莫作邊城者長淮久息兵

六月雨

驟雨忽終日高田知有秋斜風驅溽暑平地作交流屋  
漏忙移坐泥深懶出游美哉今夕睡涼意已浮浮

鴈

四郊皆積水鳴鴈一何多  
隨處沙頭宿常時月下過  
弟兄求口食羈旅困風波  
寄語支更者蘆深有網羅

新秋

雙星方卜夜載宿已交秋  
未覺炎涼改先為草木憂  
鴈來催燕去火老讓金柔  
阮籍知何事江東尚滯留

秋感

明朝交白露此夜起金風  
燈下倚孤枕籬根語百蟲  
梧

桐何處落杼軸幾家空客意驚秋半炎涼信轉蓬  
蛩依莎底露螢墮樹頭風秋已來多日人誰念二蟲火  
流幽月應雲散楚天空搖落年年事吾生鬢亦蓬

八月二十三日三溪書房賞桂二花

二花香更烈不與一花同曾記和雲折惟愁著雨空舊  
遊明月窟古意小山叢十日中秋過渾疑秋未中

冷坐

冷官宜靜坐借屋近荒村無酒可延客未昏先閉門水

明知月上木落見梅尊滿日淒涼者相逢不必言

抱膝

抱膝坐終日澹然忘是非縱令官未滿已與世相違古  
道平蕪合誰家新燕歸年荒烟火歇空老一山薇

七月梨花

紫薇紅槿外忽見此花嬌縱被秋陽暴何愁香雪消夢  
回雲冉冉春遠夜寥寥魂隔梧桐雨時吹玉笛招

和卞仲祥

我愛中秋月行歌荒野中  
亂雲催薄暮喬木易高風  
鏡裏花難折樽中酒不空  
南飛有烏鵲未見北來鴻

和黃晉卿金陵見寄

臺城為客久書札竟寥寥  
山水舟車近風霜歲月遙  
窮猿猶擇木威鳳合冲霄  
曾有論文約應須折簡招

再和卞仲祥

待月東扉外一枝明燭殘  
誰將丹桂子種在碧雲端  
病葉依窓濕飢鴻集渚寒  
嬋娟為雨妬怊悵又更闌

次西和韻

貧是儒家事生平畏四知燈花空送喜瓶粟不供炊湖  
海心終在田園計未遲願同華山叟驢背倒能騎

八月十四夜月下聞秋聲

中秋纔一宿此夜已圓明星斗何曾見雲煙不敢生黃  
花千萬粟白髮兩三莖愁聽東南角奔騰風雨聲

樹葉

不知何樹葉紅潤極鮮明一片風吹落幾番霜染成止

帝誠誑語題字亦閒情把玩真堪惜攜歸予繡杆

憶暢慶玉如四上人

臘中晴色久霜月冷森森可但思元度惟應憶道林三更難得曉一片欲歸心有約分苔石南山蒼樹陰

曉霜

重衾驚驟冷萬瓦見濃霜夾岸蕪葭白空庭橘柚黃  
情真淡泊歲晚轉荒涼野寺鐘聲早何人僕馬忙

中元詩



初秋當望夜平楚帶斜曛暑氣能昏月砧聲不隔雲華  
燈浮白水老衲誦冥文

土人放  
燈設冥

漫說中元節儒書惜未

聞

和子野四首

旅食無生計卑棲奈若何飯惟供脫粟衣未補香莎戶  
外履常滿床頭金不多老為文學掾一似舊恩科

宋特  
奏名

授縣  
文學

窮冬霜霰集行路古今難舉眼看浮世何人耐歲寒棄

瓢將止酒脫冕擬休官一室能容膝吾生亦易安

亨塗即畏塗暮境欲何如索米多貧士鈔詩欠小胥自  
緣鄉夢熟損與世情疎會約逃名者山間倒跨驢

詭遇非吾事支離笑我身文章寧可拙仕宦豈宜貧鄉  
故多新鬼年荒少佚民休嗟華黍廢陽谷易回春

再疊

醉眠春一榻不記夢伊何落月明紅葉寒廳暗綠莎散  
袍為客久高枕閱人多未有匡時策無心中甲科

世態年年改窮居事事難予懷雖浩蕩此地本酸寒古  
瀨浮貞女空齋貯冷官枯腸與藜莧歲久頗相安

老景存三樂浮生付六如是非忘馬指憎愛任烏胥

烏胥

見說苑

故里仍饑饉清流例濶疎有人風雪外詩在斷橋

驢

雪溪漁隱者郊島是前身乍見猶疑傲相逢不說貧鶴  
招窮處士梅伴老詩人時共論文酒衰顏少借春

三疊

禁酷限十日亡何能幾何流光徒往苒老眼自按沙江  
浙歸心切山林醒眼多富家憂勸率後後欲重科

為貧千寸祿乾繫欲歸難厲字誰能寄鷗盟久已寒自  
憐秦博士何似衛伶官終覺家居樂高眠一枕安

在昔金淵地煙花錦不如衣冠尊史祖

漢史崇

山水識靈

胥富歲人多賴前修日以疎洪崖仙可問願乞雪精驢  
飽喫芹宮飯飢寒未迫身公侯方重老妻子莫憂貧踪  
跡新豐客心期畫邑人皇芻歌一曲聊以和陽春

黃渚舟中

夕晴殊可喜小作川原遊  
水岸菰蔣合野田鴻鴈留雲  
煙易得晚城市那知秋落葉  
塞破屋逃亡令我愁

酌彼溪店酒醉向舟中眠  
舟人待月出急急乘晚牽前  
山見瓦屋山名小釣橫沙田橋名  
回首六百載我思唐謫仙

棕莊

幽徑秋陰合青渠草色深  
肯教木葉落直見夕陽沉  
獨客逢來鴈新寒集遠砧  
芙蓉花似錦有意媚高林

寄鄂渚王子文教授

笑把青藜杖遠遊黃鶴城  
雨消戰伐氣春生絃誦聲  
相從未有約久別難為情  
東望思渺渺江長秋月明

送楊剛中赴淮安教授

西蜀楊君子才為博士優  
儒官清似水學舍小於舟  
吳地仍多潦淮田薄有收  
雖非溫飽計足解友朋憂

風起

朔風連夕起浩蕩厲嚴寒  
遠勢驚春夢微權屬冷官  
雲

行和月暗木落打窓乾因憶吳船客波濤寢不安

廣教寺

三門當驛道四壁啟僧房頗有千竿竹能令六月涼  
撞鐘山鶴起煮茗石罌香岸曲盤渦急人言古瀨陽

次彥功韻

春早風驅雪天寒竹映門燈前終夜讀笈內故書存尚  
覺文章貴那矜齒爵尊向平愁未了女嫁與兒昏

雨止

夜半雨忽止老夫心頓寬最憐兒女弱難受雪霜寒澤  
國無來棹臺城有去鞍西村歸未卜此日敢求安

薄遊

未草閒居賦聊從薄宦遊江湖明老眼風雨暗孤舟客  
況何曾好吾生本自浮終然愧農圃將有事西疇

形影

形影自相問追隨六十年冷官真漫爾歸夢亦遽然但  
覺寒風暖難令素髮元可能學陶令家去有園田



曉出西城

閒官閒不盡曉出古城陰斗柄已插地秋聲將滿林故園三畝宅落月幾家砧為報柴桑令予今亦委心

三更汎舟謝達滄

滄水不盈尺大舟行水中朦朧微有月歛艷寂無風時序三秋半陰晴萬里同山歌與村笛醉卧聽漁童

一望四十里瀾漫白浸天何年圍此水為我壑成田風使帆船疾雲和竹葦連末流溪轉狹浮沫帶蛟涎

代步

羸驂聊代步按轡且徐行  
凹凸驚前路驅馳羨後生  
曉回天尚闇路滑雨初晴  
得似肩輿穩歸來醉不驚

舍北野步

野步上西門寬平又一邨  
疎籬圍古井密樹擁高墳  
家有田園樂氓知守令尊  
因思興廢事變滅似秋雲

次蕭饒州韻

愛山如愛士交友竟忘年  
未老先辭祿能閒始是仙  
清

談真藥石雅志樂林泉笑看衡門外隨風柳絮顛  
謙謙賢太守止止樂閒居健筆凌三謝高風繼二疏家  
猶傳故笏夢不到安車何處溪山好相從結草廬

再用韻

寓舍已三遷閒官又一年酒杯時樂聖茶碗欲通仙愛  
笋從穿壁澆花自汲泉誰能問前代劉蹶與秦顛  
數椽西郭外元不異村居官冷謀升斗頭童怯比疏莫  
愁書費紙肯嘆出無車也勝焦徵士蝸牛卧雪廬

同室

同室過百指一官寢四年幸無乞米帖何取買山錢止  
酒陶元亮思歸孟浩然乾魚蕪菜把頗勝酌貧泉

朋酒

朋酒朝朝樂鄉心夜夜愁朱雲難作吏宗玉易悲秋陵  
谷何曾改田園未可求南來幾鴻鴈亦為稻粱謀

之金陵

文學本閒官長年愧素餐出門還自笑行路有何難風

日幽懷暢江山望眼寬六朝遺迹在隨喜一遊歡

方萬里史敬輿陳孝先龔聖子胡穆仲相繼淪

沒令人感愴

諸老俱塵土令予雙淚流幾年能再見一氣故應休江  
左衣冠盡人間翰墨留空山茅屋底野史屬誰修

寄陳南翔張伯成主賓

山水未遊徧其如歸夢何獨憐黃渚月相隔白漚波秋  
盡那無鴈霜遲尚有荷終期共燈火挿架異書多

遣意

袞袞歲年晚冥冥車馬塵饑烏方畏雪凍草已殄春鄉  
老知誰健儒官自古貧明朝除夜近市井悄無人

抖擻老精神飄蓬又一春敢言惟有我每恨不如人文  
字須稱韻功名莫認真青銅杖頭在留與買烏薪

宦遊今倦矣歲晚意何如臘雪不到地春風先滿閭鄰  
翁寒乞炭溪女曉供魚多有梅花處吾將卜隱居

利交

一自儀秦去從衡直到今士緣貧失節交以利知心乍  
可昏求火何堪晝見金狂瀾回已倒猶幸有山林

聞雞

今夕知何夕此聲非惡聲窓前疑月色枕上誤天明未  
必皆三唱惟應只四更姑蘇城外寺此際已鐘鳴

題水軒

水軒寒最早偏稱冷官居老態重衾薄秋聲四壁虛霜  
前蛩漸少雨後葉金疎漁叟頑如鐵鶉衣曉捕魚

有感

腐儒乖世用作事例迂踈浪走長安道欲投光範書懸  
知成漫爾可笑賦歸與寄語陳言者毋輕出草廬

潦雨排悶二首

淫雨喧中夜羈人積隱憂葵傾那有日麥腐欲無秋小  
市渾如洗前溪漫不流林鳩無垠鵲聒聒幾時休

宿雨漲溪流江南四月秋市無糧得糴田有麥難收官  
况全然冷民飢絕可憂沙鷗應笑我何日放歸舟



跨馬

跨馬入城去驅鷄上屋飛閒官差可樂徒步未為非杜  
老平明出山公倒載歸晚汀沙水濶野鶩得相依

醉歌三首

金淵醇酒賤足可醉亡何日覺醒時少其如飲不多人  
生間調笑俗事暗消磨此意神仙會山童亦解歌  
客居真易過凡事不如儀惟有閒尋睡渾無趣作詩晚  
晴行數步日午酌三卮繫馬庭階下人多借去騎

清狂窈窕微醉困曹騰酒薄多疑水官閒一似僧已  
知燈即火不願谷為陵百事俱能了惟餘飲未能

自愛

金淵豈愛我我自愛金淵似蜜醪尤美如珠米更圓攜  
家踰八口竊祿又三年書冊盈歸篋毋嫌載月船

和友人韻

山林空入夢詩酒未忘懷老興自不淺卿言亦大佳封  
侯無骨相學道有心齋安樂行窩在棲棲且避乖

呈王達之御史

西晉文章伯南臺法令師常因行部日記得從遊時敏  
手除三害貞心畏四知何由侍王尊揮麈話襟期

贈別葉子啟郭祥卿

萍水偶相逢金淵客路中帆船明日發尊酒幾時同窮  
達無先後交遊貴始終湖堤梅柳外有約艤疎篷

敝車

汝自騎高馬予寧坐敝車功名輸俊茂天地著迂疎漫

說癡人夢仍看後世書  
謫仙酒樓在不醉欲何如

張氏隱居

杜老曾題品依稀舊隱居  
頗知書有味肯教子為儒  
築屋先通燕開池剩養魚  
相邀須飲醉酒熟不煩沽

過鄭氏幽居

趁雨過雲關東風尚峭寒  
野花渾未放石路卒難乾  
薄酒無多酌窮途信少歡  
歸來借蓑笠莫作老坡看

懷方嚴州

八十一年前科名已衰然依劉王祭檄入洛賀循船受  
禪碑誰上閒情賦自傳江山英氣歇堪恨亦堪憐

八十一年終堪嗟旅櫬窮胸中元耿耿身外竟空空白  
首太元草紫陽虛谷翁平生有遺恨五馬未乘驄

八十一年亡哀哉老紫陽佳兒方戒道小妾漫專房每  
憶先生被常懷太守章桐江詩萬首端可及龜堂

八十一年身棲遲客館貧登門曾有我銘墓竟何人醉  
夢高樓月悲歌故國春可能函玉骨歸葵練溪濱

八十一年休云何不首邱豈無商女恨肯作賈胡留書  
籍從人賣田園有子收烏聊山在望風雪去悠悠

懷張似之

少日登山履中年上水船黃花猶自綠白髮若為元但  
覺杯行速那知帽影偏南峯深秀處回首重潸然

釣鰲亭

俯瞰秦淮水前瞻魯泮宮明知倚闌者不是釣魚翁古  
石稜稜長春潮脉脉通狀元真宰相千古一吳公

除夜新居

避喧遷出郭歲晚尚擔簦陋室大於斗長途滑似冰豈  
無問字酒共守讀書燈老病須微祿歸田恨未能

糝盆夾道明爆竹小兒驚但聽窓前雪不知樓上更流  
年雙羽急深夜一鷄鳴淺醉和衣睡明朝要賀正

茅簷盈尺雪真是冷官居窮巷稀人跡今朝是歲除  
聽無鼓吹消夜足琴書曉凍水橋滑鄰家借板輿